

Na osnovu Poglavlja IV, odjeljak A, člana 23, Ustava Bosansko-podrinjskog kantona Goražde („Službene novine Bosansko-podrinjskog kantona Goražde“, broj: 8/98, 10/00 i 5/03) i člana 109. Poslovnika Skupštine Bosansko-podrinjskog kantona Goražde („Službene novine Bosansko-podrinjskog kantona Goražde“, broj: 3/18), Skupština Bosansko-podrinjskog kantona Goražde, na redovnoj sjednici, održanoj2018. godine, d o n o s i:

ZAKON O UNAPRJEĐENJU LOKALNOG POSLOVANJA BOSANSKO-PODRINJSKOG KANTONA GORAŽDE

(OPĆE ODREDBE)

Član 1.

Ovim Zakonom uređuju se pitanja unaprjeđenja lokalnog poslovanja privrednih subjekata na području Bosansko-podrinjskog kantona Goražde, definišu oblici potpore i podsticaja, propisuje način dodjele podsticaja, odobravanja i izvještavanja, propisuju izvori sredstava za potpore i podsticaje, te definišu ostali bitni elementi i uslovi koji doprinose poboljšanju privrednog odnosno lokalnog poslovanja.

Član 2.

Pod unaprjeđenjem lokalnog poslovanja podrazumijeva se stvaranje povoljnijeg poslovnog okruženja za sve privredne subjekte koji posluju na području Bosansko-podrinjskog kantona Goražde i koji su u skladu sa pozitivim zakonskim propisima registrovani kao privredni subjekti, bez obzira da li posluju u industrijskim zonama ili izvan njih.

Član 3.

Cilj, odnosno svrha stvaranja povoljnijeg poslovnog okruženja je poticanje ekonomskog rasta planiranjem i blagovremenom izgradnjom poduzetničke infrastrukture koja je u funkciji ravnomjernog razvoja Bosansko-podrinjskog kantona Goražde, bržeg rasta poduzetništva i povećanja investicija i zapošljavanja.

Član 4.

U odnosu na privredna društva, cilj i svrha unaprjeđenja poslovnog okruženja je stvaranje u potpunosti infrastrukturno opremljenih poslovnih zona, kvalitetnu cestovnu povezanost poslovnih zona sa glavnim saobraćajnim pravcima i sistem mjera odnosno oblici potpore i podsticaji za poslovanje na lokalnom nivou u Bosansko-podrinjskom kantonu Goražde.

(VRSTE PODSTICAJA)

Član 5.

Oblici potpore privrednim subjektima i vrste podsticaja definišu se po određenim modelima koji podrazumijevaju sve vrste državne pomoći definisani Zakonom o sistemima državne pomoći, odnosno definišu se kao modeli podsticaja u sljedećim oblicima:

- a) novčani podsticaji kao grant sredstva,
- b) novčani podsticaji kao revolving sredstva,
- c) novčana sredstva za subvencioniranje kamata,
- d) podrška uređenju industrijskih zona,
- e) podrška uređenju zajedničke i pojedinačne privredne infrastrukture koja će omogućiti unaprjeđenje poslovanja privrednih subjekata,
- f) podrška uvođenju međunarodnih standarda i certifikata za upravljanje kvalitetom koji će omogućiti konkurentnost na tržištu,
- g) poticanje u korištenju fondova Evropske unije,

- h) podrška za povećanje zapošljavanja,
- i) podrška za istraživanje, razvoj i primjenu inovacija, uvođenje savremenih tehnologija, te podrške za edukaciju i prekvalifikaciju,
- j) naknada uplaćenog doprinosa za zapošljavanje u ukupnom iznosu,
- k) refundacija troškova koja se izdvajaju za zdravstveno osiguranje,
- l) iznajmljivanje i davanje na korištenje imovine pod povoljnim usovima, te druge vrste potpore koje nisu u suprotnosti sa ovim Zakonom i drugim zakonskim i podzakonskim propisima.

(ZNA ČENJE POJMOVA)

Član 6.

Pojmovi koji se koriste u ovom Zakonu imaju sljedeće značenje:

- 1) oblici potpore podrazumjevaju sve vrste i oblike podsticaja, davanja sredstava, olakšica i raznih drugih vrsta refundacija troškova, kao i druge vrste državne pomoći propisane Zakonom o sistemima državne pomoći,
- 2) privredno društvo označava pravno lice upisano u sudski registar u skladu sa zakonom koji reguliše pitanja osnivanja privrednih društava,
- 3) sjedište privrednog društva ima značenje da je privredno društvo registrovano kod nadležnog suda na području Bosansko-podrinjskog kantona Goražde.

Član 7.

Za ostvarivanje i sticanje prava na korištenje modela podsticaja predviđenih ovih Zakonom, privredna društva moraju ispunjavati sljedeće uslove:

- a) moraju biti osnovana i registrovana u skladu sa važećim propisima,
- b) sjedište privrednog društva mora biti locirano na teritoriji Bosansko-podrinjskog kantona Goražde,
- c) najmanje 60% od ukupnog broja zaposlenih mora da budu lica koja imaju prebivalište u Bosansko-podrinjskom kantonu Goražde,
- d) izmirenje poreza, doprinosa i drugih obaveza u skladu sa pozitivnim-zakonskim propisima (odgođeno plaćanje, sporazum o izmirenju duga i sl.)

(DONOŠENJE PLANA I ODLUKE)

Član 8.

(1) Vlada Bosansko-podrinjskog kantona Goražde (u daljem tekstu: Vlada) na prijedlog Ministarstva za privredu Bosansko-podrinjskog kantona Goražde (u daljem tekstu: Ministarstvo), donosi Plan unaprjeđenja lokalnog poslovanja za period od tri godine (u daljem tekstu: Plan) koji treba biti usklađen sa Strategijom razvoja Bosansko-podrinjskog kantona Goražde, Dokumentom okvirnog budžeta te akcionim planovima za realizaciju ciljeva utvrđenih Strategijom razvoja Bosansko-podrinjskog kantona Goražde.

(2) Planom se utvrđuju smjernice razvoja, modeli podsticaja, nosioci provođenja modela podsticaja, aktivnosti provođenja, izvori sredstava, metodologija provođenja i praćenja provođenja pojedinih modela podsticaja.

(3) Na osnovu Plana Vlada na prijedlog Ministarstva za privredu donosi Odluku o provođenju Plana koja treba da sadrži smjernice za određivanje vrste i modela oblika potpore iz člana 5. ovog Zakona i ova Odluka određuje vrste i modele podsticaja koji će se primjenjivati u budžetskoj godini.

(4) Odluka sadrži: plan pojedinih modela podsticaja i aktivnosti, potrebna finansijska sredstva, izvore sredstava, kriterije, uslove i način korištenja sredstava.

Član 9.

Ministarstvo nadzire i prati provođenje Plana i Odluke, analizira rezultate i izrađuje izvještaje.

Član 10.

Ministarstvo za privredu Bosansko-podrinjskog kantona Goražde, prilikom izrade i donošenja Odluke iz člana 8.ovog Zakona, za provođenje Plana se rukovodi sljedećim grupama kriterija:

- a) marketinško-tržišni kriterij (razvoj i opstanak na tržištu),
- b) tehničko-tehnološki kriteriji (mogućnost inovacije proizvoda ili proizvodnje),
- c) ekonomsko-finansijski kriterij (sposobnost ostvarivanja finansijske stabilnosti),
- d) razvojni kriterij (uticaj programa na ukupni privredni razvoj razvoj Bosansko-podrinjskog kantona Goražde).

(REALIZACIJA PLANA I ODLUKE)

Član 11.

(1) Realizacija Odluke za provođenje Plana se vrši na način da Vlada Kantona na osnovu Zakona o izvršenju budžeta Bosansko-podrinjskog kantona Goražde donosi Odluku o davanju saglasnosti na programu utroška sredstava sa kriterijima raspodjele sredstava.

(2) Odlukom se definišu nazivi i vrste programa, te se za svaki program utvrđuju sljedeći elementi:

- a) ciljevi programa,
- b) kriteriji za izbor,
- c) korisnici programa i
- d) modeli podsticaja

Član 12.

Finansijska sredstva za provođenje Plana i Odluke, osiguravaju se u Budžetu Kantonu za svaku kalendarsku godinu.

Član 13.

(1) Finansijska sredstva odnosno grant sredstva iz člana 5. ovog Zakona dodjeljuju se direktno korisnicima.

(2) Izuzetno, sredstva se mogu dodjeliti korisnicima indirektno kroz implementaciju posredstvom implementatora sredstava.

(3) U skladu sa Odlukom Vlade, Javni poziv za izbor korisnika novčanih podsticaja odnosno grant sredstava raspisuje Ministarstvo, koji se objavljuje u "Službenim novinama Bosansko-podrinjskog kantona Goražde" i na web stranici Vlade/Ministarstva.

Član 14.

(1)Vlada će u Odluci iz člana 8. o provođenja Plana utvrditi kategorije korisnika poticajnih finansijskih sredstava, koje će imati pravo učešća u pojedinim programima.

(2)Prednost u ostvarivanju prava na podsticajna sredstva će imati privredna društva koja iskazuju dobit na kraju poslovne godine i koja plaćaju porez na dobit.

Član 15.

Javni poziv za izbor korisnika modela podsticaja, raspisuje Ministarstvo i obavezno sadrži:

- a) predmet Javnog poziva,
- b) pravo učestvovanja u Javnom pozivu,
- c) sadržaj prijave za dodjelu poticajnih sredstava koji podrazumijeva:

- 1) zahtjev za uključivanje u program,
 - 2) kompletan program/projekt,
 - 3) ostale priloge (opće i posebne);
- d) kriterije za ocjenu prijave i izbor korisnika,
- e) način preuzimanja tenderske dokumentacije (dokumentacije potrebne za prijavu na javni poziv)
- f) način podnošenja prijave,
- g) troškove prijave i ostale odredbe.

Član 16.

(1) Ministar Ministarstva imenuje Komisiju za izbor korisnika poticajnih sredstava.

(2) Komisija se sastoji od najmanje tri člana iz reda državnih službenika, zaposlenih u Ministarstvu, te jednog člana za obavljanje administrativno-tehničkih poslova za potrebe Komisije, iz reda namještenika i radi u potpunom sastavu.

Član 17.

Komisija ima zadatak, da u skladu sa odredbama ovog Zakona i na osnovu propisanih kriterija iz Odluke i Javnog poziva, izvrši izbor korisnika poticajnih sredstava. Po izvršenom izboru, Komisija je dužna sačiniti Izvještaj o svom radu, sa prijedlogom korisnika za dodjelu poticajnih sredstava i iste dostaviti Ministru.

Član 18.

Komisija će dati prednost poticaju onih programa/projekata koji se oslanjaju na slijedeća načelna:

- a) proizvodi i usluge kojima se ostvaruje veća dodatna vrijednost,
- b) poduzetnička sposobnost i upravljačka znanja,
- c) korištenje različitih izvora finansiranja,
- d) postizanje ravnomjernijeg regionalnog razvoja.

Član 19.

(1) Tokom svog rada Komisija za izbor korisnika rukovodi se kriterijima utvrđenim u Odluci i Javnom pozivu, a osnovni kriterij je kvalitet programa/projekta.

(2) Kvalitet programa/projekta ocjenjuje se kroz preferiranje proizvodne nad uslužnom djelatnošću, osiguranja finansijskih sredstava iz drugih izvora, pokretanja aktivnosti koje koriste nove tehnologije, rast i opstojnost (prisutnost na tržištu u godinama), te ostvarene nagrade i priznanja.

(3) Prilikom ocjene programa/projekta Komisija uzima u obzir i vrednuje:

- a) stepen samofinansiranja,
- b) mogućnost povećanja zaposlenosti, uključujući i strukturu novih zaposlenika,
- c) mogućnost pružanja obuke za strukovna zanimanja,
- d) čuvanje kulturne i historijske baštine,
- e) tradicija u vođenju poslovanja,
- f) izvozno orijentisanu proizvodnju i supstituciju uvoza,
- g) uvođenje novih tehnologija, certifikata i međunarodnih standarda kvalitete,
- h) sufinansiranje Programa, u saradnji sa nosiocem Programa unaprjeđenja lokalnog poslovanja.

Član 20.

(1) U postupku po Javnom pozivu Ministarstvo ne snosi nikakve troškove učesnika Javnog poziva, te zadržava pravo da njihove programe/projekte prihvati u cijelosti, djelimično ili ih odbije, da poništi Javni poziv, ili da odbaci sve programe/projekte, u bilo koje vrijeme prije zaključenja ugovora.

(2) Podnosiocima prijave koja udovoljava formalno-pravnim uslovima iz Javnog poziva, a koji bude odbijen zbog nedovoljnih sredstava, ili slabijeg kvaliteta ponuđenog programa/projekta, na njegov pismeni zahtjev, Ministarstvo će obrazložiti razloge zbog kojih isti nije rangiran.

(POSTUPAK ODOBRAVANJA PODSTICAJA I NADZOR)

Član 21.

(1) Prijedlog Odluke o izboru korisnika poticajnih sredstava donosi Vlada.

(2) Nakon što Vlada donese Odluku, sa kandidatima sa konačne liste ugovorni organ – davalac sredstava zaključuje Ugovor o implementaciji poticajnih sredstava.

(3) Ugovor obavezno sadrži visinu, namjenu i uslove dodjele sredstava, rokove utroška odobrenih sredstava, međusobna prava i obaveze, kao što su: način i rokovi izvještavanja o utrošku sredstava, nadzor nad utroškom sredstava u svrhu za koju su odobrena, sredstva obezbjeđenja namjenskog utroška sredstava (bjanko mjenica ili bankovna garancija), te sankcije u slučaju nepoštivanja Ugovora.

Član 22.

Ugovor obavezno sadrži sve elemente u skladu sa odredbama Zakona o obligacionim odnosima, a naročito sadrži obaveze korisnika i to:

a) da se odobrena sredstva koriste namjenski, u skladu sa ponuđenim i od Ministarstva prihvaćenim investicijskim programom/projektom,

b) da izuzetno može samoinicijativno izvršiti prenamjenu dodijeljenih sredstava poticaja, s jedne na drugu stavku projekta, najviše u visini do 10% ukupne vrijednosti dodijeljenih sredstava, a preko tog ograničenja, samo uz prethodnu saglasnost Vlade,

c) da se pridržava rokova implementacije projekta i dodijeljenih finansijskih sredstava,

d) da pismenim putem obavijesti ugovor organ-davaoca sredstava iz stava 2. ovog člana o događajima ili problemima koji su od posebnog značaja za implementaciju projekta, a koji mogu uticati na blagovremeno ispunjenje zadataka i ciljeva projekta, odnosno o nastanku neočekivanih uslova koji mogu omesti implementaciju projekta,

e) da u roku od 30 dana, nakon implementacije projekta, podnese Ministarstvu konačni i u potpunosti popunjeni obrazac "Izvještaj o implementaciji dodijeljenih sredstava", koji se smatra sastavnim dijelom Ugovora, sa valjanim dokazima o pravilno utrošenim sredstvima,

f) da se prilikom implementacije sredstava pridržava svih pozitivnih zakonskih propisa koji se primjenjuju u Bosni i Hercegovini, Federaciji Bosne i Hercegovine i Bosansko-podrinjskom kantonu Goražde.

Član 23.

Ugovorom se također definišu obaveze i odgovornosti ugovornog organa-davaoca sredstava i to:

a) da izvrši uplatu odobrenih sredstava korisniku,

b) da vrši kontrolu utroška odobrenih finansijskih sredstava i aktivnosti planiranih projektom, što podrazumijeva posjete na terenu, praćenje napredovanja projekta u skladu sa rokom njegove implementacijem kao i druge radnje kojima može uspješno nadzirati implementaciju projekta,

c) da razmotri i pismeno odgovori na obavijest korisnika sredstava,

d) u slučaju da se, uslijed ograničenosti sredstava poticaja, korisniku dodijeli manji iznos od onog koji je postavljen u zahtjevu i njegovom projektu, Ugovorom će se urediti koji dio projekta će se realizovati kroz dodijeljena sredstva,

e) da preduzme sve zakonom predviđene mjere za povrat uplaćenih sredstava, ukoliko korisnik u ugovorenom roku ne započne njihovu implementaciju i ne preduzme sve predviđene programske aktivnosti, ili troši uplaćena sredstva nenamjenski, te je

očigledno da nije niti imo namjeru implementirati dodijeljena sredstva za aktivnosti opisane u programu/projektu.

Član 24.

(1) Korisnik sredstava može, prema uslovima iz Ugovora, jednostrano raskinuti Ugovor i odmah izvršiti povrat uplaćenih sredstava, ili dijela sredstava, ukoliko utvrdi da ista neće moći iskoristiti na način i pod uslovima pod kojim su mu odobrena.

(2) Ugovorni organ-davalac sredstava može jednostrano raskinuti Ugovor ukoliko i kada utvrdi da korisnik sredstava ne koristi odobrena novčana sredstva na način i pod uslovima po kojim su mu ista odobrena.

(3) Obje ugovorne strane mogu raskinuti Ugovor u slučaju događaja prouzročenih višom silom, koji mogu odgoditi ili u potpunosti spriječiti implementaciju projekta i/ili sredstava.

(4) U Ugovor se obavezno ugrađuje odredba o saglasnosti korisnika sredstava da odobrena sredstva odmah vrati ugovornom organu-davaocu sredstava u slučaju raskida Ugovora, na zahtjev bilo koje strane, iz naprijed navedenih razloga.

(PRELAZNE I ZAVRŠNE ODREDBE)

Član 25.

(1) Vlada će nakon stupanja na snagu ovog Zakona, donijeti Listu privrednih društava od strateškog interesa za Bosansko-podrinjski kanton Goražde.

(2) Vlada će utvrditi kriterije i uslove za uvrštavanje na Listu privrednih društava od strateškog interesa za Kanton.

Član 26.

(1) Privredna društva koja budu uvrštena na Listu će imati poseban tretman i prioritet kod dodjeljivanja poticajnih sredstava i drugih modela podsticaja.

(2) Vlada će svim privrednim društvima sa Liste pružati punu podršku prilikom izrade različitih projekata i realizacije istih, kako na lokalnom tako i na međunarodnom nivou, u smislu podrške prilikom apliciranja projekata za korištenje sredstava Evropske unije.

Član 27.

Ovaj Zakon stupa na snagu osmog dana od dana objavljivanja u "Službenim novinama Bosansko-podrinjskog kantona Goražde".

Bosna i Hercegovina
Federacija Bosne i Hercegovine
Bosansko-podrinjski kanton
S K U P Š T I N A

PREDSJEDAVALA

Broj: 01/02-_____/18
____ 2018. godine
G o r a ž d e

Aida Obuća, s.r.

OBRAZLOŽENJE

1. USTAVNI OSNOV

Ustavni osnov za donošenje navedenog Zakona sadržan je u odredbama Poglavlja IV odjeljak A člana 23. Ustava Bosansko-podrinjskog kantona Goražde („Službene novine Bosansko-podrinjskog kantona Goražde“ broj:8/98,10/00 i 5/03) kojim je utvrđeno da Skupština Bosansko-podrinjskog kantona Goražde donosi zakone i druge propise u okviru izvršavanja nadležnosti kantona. Odredbama članova 16. i 18. Ustava BPK Goražde utvrđene su isključive nadležnosti kantona te vršenje nadležnosti. Ovim odredbama se između ostalog utvrđuje nadležnost za donošenje propisa o unaprjeđivanju lokalnog poslovanja, donošenje odluka u okviru utvrđene ekonomske politike za podsticanje privrednog i društvenog razvoja.

2. RAZLOZI ZA DONOŠENJE ZAKONA

U programu rada Skupštine BPK-a Goražde za 2016. godinu, predviđeno je donošenje Zakona o unaprijeđenju lokalnog poslovanja Bosansko-podrinjskog kantona Goražde.

U dosadašnjoj praksi, kada je u pitanju podsticanje razvoja privrede, pokazalo se da se gotovo čitav sistem podsticaja planira kroz programe utroška sredstava koji se donosi na godišnjem nivou. S druge strane, trenutno ne postoji zakonski osnov koji bi na adekvatan način predvidio i propisao podsticajne mjere, utvrdio politiku i smjernice razvoja privrede, regulisao pitanje načina dodjele podsticajnih sredstava, propisao kriterije, uslove i proceduru dodjele odnosno odobravanja određenih podsticaja. U tom smislu, došlo se na ideju da se dosadašnja praksa dodjele podsticaja i unaprjeđenje poslovnog ambijenta definiše kroz zakonske norme. Također, evidentno je da prihodi po osnovu poreza na dobit se povećavaju iz godine u godinu, što predstavlja jedan od osnova da se poticaji privredi mogu ekvivalentno povećavati odnosno da se na ovaj način treba stimulisati privreda kako bi se nastavio trend povećanja dobiti privrednih društava.

3. OBRAZLOŽENJE POJEDINIH ODREDBI

Predloženi Zakon sadrži ukupno 27 članova, a odredbe članova od 1 do 4 regulišu opće odredbe, definišu svrhu i cilj zakona.

Odredbe od člana 5 do 8 regulišu oblike potpore privrednim subjektima, odnosno modele podsticaja, uslove koje privredna društva moraju ispunjavati za dodjelu podsticaja, te propisuju obavezu donošenja Plana unaprijeđenja lokalnog poslovanja na period od 3 godine, koji mora biti usklađen sa Strategijom razvoja kantona, Dokumentom okvirnog budžeta, akcionim planovima i ciljevima iz Strategije. Ono što smatramo da je bitno napomenuti jeste da uslovi za dodjelu podsticaja propisuju obavezu sjedišta privrednog društva na teritoriji BPK Goražde te da je najmanje 60 % zaposlenih sa prebivalištem u BPK Goražde.

Odredbe članova od 9 do 13 regulišu pitanje nosioca izrade Plana unaprijeđenja lokalnog poslovanja, nadzor nad primjenom, te definiše visinu finansijskih sredstava koja se obezbjeđuju za provođenje Plana. Ono što smatramo da je bitno istaći jeste da će se finansijska sredstva za realizaciju Plana obezbjediti iz sredstava koja se uplate po osnovu prihoda nastalih primjenom Zakona o porezu na dobit. Poznato nam je da navedeni Zakon o porezu na dobit propisuje obavezu plaćanja poreza na dobit i za privredna društva koja izvoze, što do sada nije bio slučaj

jer su ova privredna društva bila oslobođena plaćanja poreza na dobit. Svrha i smisao donošenja Zakona o unaprjeđenju lokalnog poslovanja u pogledu obezbjeđenja finansijskih sredstava za njegovu realizaciju, jeste da se sredstva prikupljena po osnovu poreza na dobit praktično ponovno kroz podsticaje vrte privrednim društvima, odnosno da se u jednom ekvivalentu podstiče privreda kako bi ujedno se povećavala i dobit privrednih društava.

Odredbe članova od 14 do 22 ovog Zakona propisuju način dodjele sredstava, definišu obavezu javnog poziva za odabir korisnika, propisuju se uslovi i kriteriji koje javni poziv mora sadržavati, predviđa se formiranje komisije za izbor korisnika sredstava, prednost pri odabiru korisnika, propisuje se ocjenjivanje programa odnosno projekata sa kojima aplicira potencijalni korisnik sredstava, te utvrđuje procedura odobravanja sredstava i zaključivanje ugovora o dodjeli i korištenju sredstava.

Odredbe članova od 23 do 24 propisuju osnovne i posebne elemente Ugovora o korištenju sredstava odnosno o implementaciji podsticajnih sredstava, obaveze korisnika sredstava, obaveze davaoca sredstava te način raskida Ugovora.

Ostale odredbe od člana 25 do 27 propisuju donošenje Liste privrednih društava od strateškog interesa za Bosansko-podrinjski kantona Goražde, utvrđuju poseban tretman privrednih društava te odredbe stupanja na snagu Zakona.

4. OČEKIVANI EFEKTI

Očekivani efekti koji se postižu donošenjem ovog propisa se najprije odnose na uređenje ove oblasti u smislu propisivanja procedura dodjele sredstava, uslova i kriterija, vrste podsticaja, te kreiranja planskog pristupa u dodjeli podsticajnih sredstava. Ovdje svakako treba napomenuti da se efekti očekuju u smislu jačeg i bržeg privrednog razvoja kroz plansko i racionalno korištenje podsticajnih sredstava, a što u konačnici ima za cilj povećanje broja zaposlenih, novo zapošljavanje i brži privredni razvoj. Samim tim logično je da će doći do smanjenja broja nezaposlenih, povećanje zapošljavanja novih radnika te se očekuju i veći prihodi po osnovu poreza i doprinosa.

5. FINANSIJSKA SREDSTVA POTREBNA ZA PROVOĐENJE OVOG ZAKONA

Za provođenje ovog Zakona su potrebna finansijska sredstva. Naime, izvor sredstava za provođenje ovog Zakona jesu sredstva budžeta Kantona. Evidentno je da se prihodi po osnovu poreza na dobit povećavaju i da po ovom osnovu dolazi do povećanja prihoda u budžetu kantona, a dalje ti prihodi bi se po ovom predloženom Zakonu trebali na neki način usmjeriti na privredni razvoj i na podsticaje privredi. Uzmemo li se u obzir dosadašnja sredstva prikupljena po osnovu poreza na dobit, smatramo da se za provođenje ovog Zakona trebaju izdvojiti sredstva u iznosu od 500.000,00 KM godišnje. Ovaj iznos je realan i objektivan jer smatramo da je to jedan minimum sredstava koja bi imala određene efekte u podsticajnim mjerama za razvoj privrede. Ukoliko se uzmu u obzir dosadašnja izdvajanja za razvoj privrede, doći će se do zaključka da ova sredstva ne predstavljaju značajnija odstupanja od ranijih iznosa sredstava koja su usmjeravana u razvoj privrede. Također, treba napomenuti da Strategija razvoja Bosansko-podrinjskog kantona Goražde (“Službene novine Bosansko-podrinjskog kantona Goražde” broj: 4/16) kroz strateške ciljeve i to konkretno strateški cilj 1. podrazumjeva obezbjeđenje sredstava za uspostavu pogodnog privrednog okruženja, tako da gore navedena sredstva od 500.000,00 KM koja su potrebna za provođenje Zakona, predstavljaju iznos potreban za provođenje ciljeva i mjera utvrđenih Strategijom.